

# Paurongo

## Garata Kpebung Yeneac Kibi

### Ohoe

---

**1** <sup>1</sup>Aposoro Pauro nearunac. Ngic yeneng uayoac yomoc mi nenggenc  
nga ngic monggo ifingoc ua yomocac sing mi meficgenenec, imoc  
kpac. Imoc Anutu Manggacnjo, Kristo homecfunac megboriec, ye nga  
Yesu Kristo yereng sing imoc meficgenenocac ua yomoc mekecduae. <sup>2</sup>Ni  
nga tosofocna nenahafoc kecdimbe, neneng Garata kpebung ngeneac kibi  
yomoc faingemmedimbe.

<sup>3</sup>Danggunuc nga ruae Manggacnina Anutuarunac nga Kebunina Yesu  
Kristo yearunac ngenearu febeso. <sup>4</sup>Ye Mannina Anutuac negen negeng  
nga songoya modacma nenang kopocsicac amma yengena kekeha waec.  
Ifi amma naso mangana yofinenggac kecdimbe, imohacnac meicnunuec.  
<sup>5</sup>Imocac amma yearu dedengerec wisic wisickea kpac fekengkecbeso,  
imoc fora.

<sup>6</sup>Anutungo Kristoac wosoefacfu ye modacgecdeac ngeni kpacngunuec.  
Amma ngeni ine ye bic yombong wama kengkecma siduc gombung  
siriha monggac kedzac faima modackedae, imoc hemba wiac mangana  
yombong anu imocac negenga homac mema warecngunuduae.  
<sup>7</sup>Amma siduc gombung siriha mong imoc mi fede. Ngic goango ine  
Kristoac siduc gombunggac siriha netohogecdeac ayemmeu ngeneac  
uba mesufu angkecdae. <sup>8</sup>Nga siduc gombung neneng bic edekpou  
angemmeing, imoc ine neneng me kurumennunac angero mongngo, imoc  
netohoma siriha mong edekpou angemmeudeu ye sowecyoacac bageu  
kecbeso. <sup>9</sup>Nga yoac bic deing yoc monggoc deduae, ngeni siduc gombung  
bic negemma hoanggegac, ngic mongngo imoc netohoma siriha mong  
edekpou angemmeudeu ye sowecyoacac bageu kecbeso.

<sup>10</sup> Anu ni yaguc yoac deduae, imoc ngic yeneng negen ngereenugecdeac mi deduae. Imoc Anutungo negen ngereenuudeac amma deduae. Amma ngic yeneng neac negenggac ngereeudeac ua mebai dede Kristoac wanacngic naric mi kecbai.

<sup>11</sup> Tosofocna, siduc gombung dekperagianduae, negen negeng imoc ngic dedeunac kpac, imoc edengunubadeac negenduae. <sup>12</sup> Ngic mongngo deu negenai me mongngo mi kpounenec, imoc kpac. Yesu Kristo yengenaoc imoc ine kpefinnu mekperagima kpounenec. <sup>13</sup> Ni warac yudangic yeneac negen negeng arennu kecma faka anai, ngeni imoc bic negendae. Nga Anutuac kpebungfora efea mi yunukporac ayemmemma memanganeyunuai. <sup>14</sup> Nga yudangic neneac dedeseri nga fakau negen negennango yadikecma yudangicngac ogofocna yeni homac feracyunuai. Amma esangabofocnina yeneac singyoac negemma herena gerec dzeu imoc meserikefai.

<sup>15</sup> Nengac heremanau tacbare Anutu yengenaoc meisinnuma wosoefahaac kpacnuec. <sup>16</sup> Amma yeng songea modacma Medaha yengenaoc mewakenuu ni Medahaac siduc imoc bangec monnunac ngicngac Anutu mi negemmidae, yenearu dekperagibadeac ifi anec. Anu ni naso imohaingoc kemma dafi ambadeac ngic goa dekpesi mong mi ayemmeai. <sup>17</sup> Amma ngic warainemma aposoro anggec yenembadeac Yerusarennu mi kenai, kpac. Ni ine Arabia bangecfu kemma monggoc Damasko dzigeneai.

<sup>18</sup> Ihai kecbare kifa harebec wisickemanu Kefa hembadeac Yerusarennu kemma uameme 15 yegoc kefai.<sup>a</sup> <sup>19</sup> Amma imohai kecma aposoro mong mi yenennai. Ni Kebuac munea Yakobosac henai. <sup>20</sup> Yoac ohoduae imoc ikoc kpac, imoc Anutuac kicfu deduae.

<sup>21</sup> Anu imocac ngadeau Siria nga Kirikia prowinsiu kemma kefai. <sup>22</sup> Nga Yudaia bangecfu Kristoac kpebung kecdae, yeneng ni mi negennugec. <sup>23</sup> Goa yeneng yofi degec negenggac, “Ngic ye warac nunukporac anemmeec, ye negen negensinggac siduc gombung memanganeeecngo imoc yaguc ngicngac edekpou ayemmekecde.” <sup>24</sup> Yeni ifi dema neac amma Anutu dengeregec.

**2** <sup>1</sup> Anu kifa 14 wisickeu ni monggoc Yerusarennu kenai. Naso imohai Banabagoc neri Tito hesickede nenahafoc kening. <sup>2</sup> Ni Yerusarennu kembadeac Anutungo kpefinnu edenuec. Ihai kemma siduc gombung bangec monnunac ngicngac Anutu mi negemmigec, yenearu sing edekpou ayemmekefai siduc imoc ngic enara degec kecgec, yeni tembul tembul dekperagiyemmeai. Ni warac nedziai nga yaguc nedziduaengoc, uana imocngo sicsauc amma fora kpac ambacac yoac imoc dekperagiyemmeai.<sup>b</sup> <sup>3</sup> Anu Tito grikngicngo nigoc haec, ye sebi tosea herecgegecdeac enara

---

<sup>a</sup> 1:18 Kefa imoc Petoro. Yesungo kpara mong ifi miec.    <sup>b</sup> 2:2 Paurongo yoac heima nedzi nedziac yoac homac dede.

yeneng mong mi degec. <sup>4</sup>Ngic goa tosofocnina mi andae, yeneng ine Titoac ifi degec. Yeni sing eseaac bageu fainunugecdeac hama botucninai kecma Kristongo witicfunac menunuec, imocac kickitong kecdae. <sup>5</sup>Nga siduc gombunggac yoac fora ngenearu seria feudeac neneng naso monggac ngic ifia yeneac yoac bageau mong mi kefing, kpac.

<sup>6</sup>Anu ua mekecduae dema ngic enara yeneng imohai wiac mong torokpema ambadeac mi edenugec, kpac. Nga yeneng warac dafi kecgec, imoc naric mi debade. Anutungo ngic sebiacsac hemma ngicngac mi isingyunuude. <sup>7</sup>Yeneng ine faka fora yofia hemma mariu meme anggec. Anutungo Petoro ngic sebi tosangina herec herecgea yenearu siduc gombung dekperagiudeac uayoac miec, ifi isocngoc ni ngic sebi tosangina mi herec herecgea, yenearu siduc gombung dekperagibadeac uayoac nenec. <sup>8</sup>Anutungo Petoro ua kucgoc meudeac fenggemiu, yeng ngic sebi tosangina herec herecgea, yeneac botucfu aposoro ua meec. Nga ni ifi isocngoc ua kucgoc mebadeac fenggenenu bangec monnunac ngicngac Anutu mi negemmidae, yeneac botucfu aposoro ua mekecduae.

<sup>9</sup>Anu kpebunggac ngic wotunga degec, Yakobo nga Kefa amma Yohane, yeni Anutuac danggunuc fenenec, imoc hentegecma yeni ni nga Banaba nerigoc uba mocgu amma marinira mema yofi degec, “Ngeri bangec monnunac ngicngac Anutu mi negemmidae, yenearu siduc gombung dekperagibesera nga neneng ngic sebi tosangina herec herecgea, yenearu siduc gombung dekperaginide.” <sup>10</sup>Ifi dema yoac mocgusac yofi torokpegec, “Ngeni ngicngac makpekpea, yeneac ebic negensibisia.” ifi degecac ni imocnoc negemma mamangkima ua serima mekefai.

<sup>11</sup>Anu Petorongo Antiokia hama sing segeec. Imocac amma ni namma kopocsic anec, imoc edeai. <sup>12</sup>Yakoboarunac areng goa mi hamagec ye bangec monnunac ngicngac yenigoc yaka nekefec. Nga ngic sebi tosangina herec herecgea arengfora goa hasikegec, imohai ye kengec amma bangec monnunac ngic wayunuma yenigoc monggoc mi tarec. <sup>13</sup>Ifi anu yudangic tosea yeni ifingoc yegoc sebimeme anggec. Nga Banabango ifingoc ikoc fakangina modacma sing segeec. <sup>14</sup>Anu yenemba, yeni siduc gombunggac yoac foraac faka mi modacgec, ni ngicngac sasawa yeneac kicfu Petoro yofi edeai, “Ge yudangicnac amma yudangic fakanina wama bangec monnunac ngicngac, yeneac faka modacanne, ge ine bangec monnunac ngic, yeneng yuda neneac faka modacgecdeac fakagau edzacyununec, imoc mi ngereede.”

<sup>15</sup>Neni yuda arenunnac fingering nga bangec monnunac ngicngac Anutu mi negemmidae, kopocsicmeme areng yenearuac mi fingering. <sup>16</sup>Ngic mong ye Yesu Kristo negensinggedeu Anutungo yeac ngic dindingac demiude, imoc negendimbe. Ngic mong ye dedeseriyoac modacma kecde, Anutungo ye dindingac mi demiude, kpac. Nga Anutungo negen negensinninaac amma dindingac denemmeudeac neni

dedeseriyoacac sing wama Yesu negensinggema kecdimbe. Imoc yofiac, ngicngac dedeseriyoac modacandae, Anutungo yeni ngicngac dindingac naric mi deyemmeude, kpac. Ye ngicngac Yesu negensinggema kecdae, yeni ine dindingac deyemmeude.

<sup>17</sup>Goa yeni neneac yofi dedae, “Ngeni dedeseriyoac wama kopocsic meficgedae.” Ifi febac dede Kristongo kopocsicac sing meficgengemmebac nga ifi kpac. <sup>18</sup>Ni wiac bic wama meickeai, imocac tataha monggoc mengerebadeu kopocsic meficgebai. Nga ni ine faka eseaac tatac monggoc mi mengerebade, kpac. <sup>19</sup>Ni Kristogoc mariponnu momoc nugec nanic. Nga Anutugoc kecbadeac amma dedeseriyoacngo kopocsicna edzacnuu Kristogoc homema yoac imoc wayai.

<sup>20</sup>Imocac amma ni neannaoc monggoc mi kecduae. Kristongo neac ubaheremanau kecde. Imocac yofinenggac kecma Anutuac Medac negensingeba yeng kekecnau mewakenude. Yennoc heresongogoc hoannuma neac amma yengena kekeha waec. <sup>21</sup>Anutuac wosoefac ubanango mi waduae. Ngic mong ye dedeseriyoac modacande, Anutungo ye ngic dindingac imoc naric mi demiude, kpac. Imocac amma Yesungo mariponnu homeec. Dedeseriyoac kuhagoc febac Yesungo mariponnu naric mi homebac.

**3** <sup>1</sup>Garata ngic, ngeni negen negentegecngina kpac yombong. Yesu Kristo mariponnu kpegec nanec, ngeni imoc negentegecgecedeac kicnginau yoac soha kpoungemmeing. Nga ngic monggo ine kundunggac faka mong angemmema negen negengngina mesufuu ngeni ifi isoc kecdae. <sup>2</sup>Ngeni yofi isinggebisia, neni siduc gombung edengununi ngeni imoc negensinggema Asu megecnoc. Ngeni ine angammemenginango dedeseriyoac modacgecac amma Asu mi megec, kpac. <sup>3</sup>Ngeni Asugoc kekecngina hanahegecngo yaguc ine uba eseaac uau monggoc kecdae, imoc mi ngereede. Ngeni kapafaka yombong andae. <sup>4</sup>Ngeni warac Yesuac amma kpendzengtoa kpegec. Nga yaguc ine imocac fora engsac wadae. <sup>5</sup>Ngeni Abrahang isoc Anutuac yoac negemma negensinggegecac Asungo hama kucfakaya botucnginau mekecde. Nga faka imoc dedeseriyoac mekecdaeac amma mi fingecde.

<sup>6</sup>Imoc yofi fingerec,

Abrahang ye Anutu negensinggeu Anutungo ye ngic dindingac demiec. *(Fingec fingec 15:6)*

<sup>7</sup>Imocac amma ngicngac Anutu negensinggema kecdimbe, nenang Abarahanggac medacfora, ngeni imoc negentegecbisia. <sup>8</sup>Nga Anutungo bangec monnunac ngicngac, yeni negen negensingnginaac amma dindingac deyemmeude. Ye imocac siduc gombung warac Abarahang edeec nga imoc mitikibiu yofi oho ohoya fede,

“Bangec monnunac ngicngac, yeni sasawango gearu hama kenecgoc anggecde.” *(Fingec fingec 12:3; 18:18; 22:18)*

<sup>9</sup> Abrahangng Anutuac yoac negensinggeec nga ngicngac yeneng Anutuac yoac negensinggedae, yeni Abrahanggoc kenec megecde.

<sup>10</sup> Ngicngac yeneng dedeseriyoac tobanggema tofohokecdae, yeni sasawango sowecac bageu kecdae. Mitikibiu imocac yoac mong yofi oho ohoya fede,

“Ngicngac dedeseriyoacf wiac oho ohoya fede, imoc wama mi modackecdae, yeni sowecac bageu kecdae.” *(Dedeseri 27:26)*

<sup>11</sup> Mitikibingo ifingoc yofi dede,

“Ngic mong ye negen negensing arennu kefude, Anutungo ye ngic dindingac demiude.” *(Habakuc 2:4)*

Nga mong ye dedeseriyoac modackecde, Anutungo yeac dindingac mi demiude, kpac. <sup>12</sup> Dedeseriyoacngo negen negensinggac yoac mimekperagiude. Nga yoac mong yofi ine dedea,

“Ngic mong ye yoac imoc modacma kecde, yeng imocac manau kefude.” *(Sesememe 18:5)*

<sup>13</sup> Yesungo donina mema dedeseriyoacac sowecfunac bummenunuec.

Nga yoac yofi oho ohoya fede,

“Ngic sasawa icfu gbedicyunugec nanggec, yeni sowecnginagoc.”

*(Dedeseri 21:23)*

Ifi feecac dedeseriyoacac sowecngo Kristo sendenggeu yeng dedeseriyoacac sowecfunac menunuec. <sup>14</sup> Anutungo kenec Abrahang miec, imocngo Yesuac amma bangec monnunac ngicngac, yenearu kendarudeac Yesungo bummenunuec. Ifi anu Anutungo yoac deseriec, imoc modaru nenang Yesu negensinggeni Asu nemmeec.

<sup>15</sup> Tosofocna, ni ngic fakanina fede imocac sirihau edengunuba negenggec. Ngic mongngo maridzominggac yoac deserima deu ngic mongngo imoc naric mi kpeude nga yoac mong imocac witiau mi torokpeude. <sup>16</sup> Anutungo Abrahang nga bangeha yeri wiac goa yemerudeac yoac dedzege anec, imoc ye bangecfora homac yeneac mi deec. Ye ine ngic mocguacsac yofi deec, “bangecga.” Nga ngic imocnog Kristo. (*Fingec fingec 12:7; 13:15; 24:7*) <sup>17</sup> Ni imocac amma yofi deduae, Anutungo Abrahanggoc dzadzahac deseriec nga kecma kifa 430 wisickemanu Mosegoc dedeseriyoac fingerec, imocnko dzadzahac esea naric mi kpeude me meickeude. <sup>18</sup> Manggac mongngo maridzominggac yoac mong mi deude isoc nambaracfora yeni dedeseriyoacac sing modacma maridzomingngina megecde. Nga Anutungo Abrahang wiac miec imocnko maridzominggac yoac modarec.

<sup>19</sup> Ifi anudeu dedeseriyoac nocac faifaia fede? Imoc yoackpekpeac amma faifaia fede. Abrahanggac bangeha ye mi fingecmanu Moseac dedeseriyoacngo kuhagoc feec. Bangeha yeacnoc maridzominggac yoac oho ohoya feec.

Anu angero yeneng ine dedeseriyoac mema uba mocgu fingerudeac hengising ngicngina Mose migec.<sup>20</sup> Hengising ngic ye ine areng mocguac yoac mi deude. Nga Anutu ye mocgu amma yengena yoacacsac deude.<sup>c</sup>

<sup>21</sup> Anutungo Abrahanggoc yoac dzegeec, imoc dedeseriyoacngo mi kpede, imoc kpac yombong. Anutungo dedeseriyoac nemmeec, imocngko kekecseri meficgenemmebac dede ye dedeseriyoacac amma ngicngac dindingac denemmebac, amma ifi mi fingerec. <sup>22</sup> Ngicngac Yesu Kristo negensinggema Abrahanggac dedzegeyoac hoanggekecdae, yeni maridzomingngina megecede. Imoc fingerudeac mitikibingo ngicngac sasawa kopocsicac bageu faiyunuec.

<sup>23</sup> Negen negensingngo mi femanu neni witicamau tacni, dedeseriyoacngo garenunuec. Nga negen negensingngo fingeru ebic imoc kpac anec. <sup>24</sup> Nga dedeseriyoacngo garenunuu kecminangoc Anutungo negen negensinnu dindingac denemmeudeac Kristongo fingerec. <sup>25</sup> Nga naso yomoc negen negensinggac sing dindingac kekec bic fingerec. Imoc amma dedeseri garenggac bageu monggoc mi kecdimbe. <sup>26</sup> Ngeni sasawango negen negensinnu Yesu Kristogoc kpeketahemha kecma Anutuac medacfora andae. <sup>27</sup> Nga ngicngac Kristoaru doku nadzicgec, ngeni sasawa siricngina yofi, Kristongo wambangina anu ngeni ye heigec kemee. <sup>28</sup> Imoc yudangic me grikngic me wanacngic minginagoc me ngic witha kpac, ngic me ngac, ngeni areng mong mong mi andae, ngeni sasawango Yesu Kristoaru kpeketahemha areng mocgu andae. <sup>29</sup> Nga Kristogoc kpeketahedaue Abrahanggac bangecfora kecma Anutuac yoac dedzegegoc kpeturanggema maridzominggac areng Kristogoc anggecede.

**4** <sup>1</sup>Ni yofi negemma deduae, medac mongngo maridzominga yeac anudeac negemma medacbisis amma imocac tomai kecde, ye kpara kpac kecma wanacngic isoc kefude. <sup>2</sup>Ye yengena garenggac bageu amma hiedzo garenggac bageu kecmanungoc mamango naso deec, imoc hasikeu finaha tiu enude. <sup>3</sup>Nenang ifingoc ifi kefing. Nambarac kecminangoc bangecac hadehade yeneng wanac menunugec yeneac bageu kefing. <sup>4</sup>Kecmina naso dedea, imoc hasikeu Anutungo yengena Medaha sueu maec. Ye dedeseriyoacac bageu ngacfу fingerec. <sup>5</sup>Fingecma ngicngac dedeseriyoac bageu kecdimbe, nenang ihacnac yungecnunuу erema yengena medahaac tatac menideac maec.

<sup>6</sup>Ngeni nambaracfora andae, imocac amma Anutungo Medahaac Asu sueu hereninaу kecma yofi kiackede, “Manggac, neac Manna.” <sup>7</sup>Imoc amma, ge monggoc wanacngic mi annade. Ge Anutuac medactatac mena yeng maridzomingga dedea, imoc genude.

<sup>c</sup> 3:20 Imoc amma yoac dedzege Anutungo Abrahanggoc meec imocngko Moseac yoac ferahede.

<sup>8</sup> Anu ngeni warac Anutu mi negenggec nemu yeneng wanac mengunugec. Amma nemu imoc yeni Anutuac siric isoc kpac. <sup>9</sup>Ngeni yofinenggac ireckema Anutu negemmidae me yofi naric deba, Anutungo ngeni bic negengngunu kecdae. Nga ngeni monggoc dzigenema bangecac hadehade makpekpea nga kucngina kpac, yenearu monggoc kemma yeneac wanac areng anggecdeac negendae, fakangina imocngo obohode. <sup>10</sup>Amma ngeni uameme goa nga afo goa nga kpefinnu naso hemma kifaac siriha naso haniaac negenggec fora anu imoc modacma kecandae. <sup>11</sup>Nga uatoa ngenearu meai, imocngo fora kpac ambacac amma negengyohoc anduae.

<sup>12</sup>Tosofocna, ni ngeni isoc kecduae, imocac ngeni ni isoc anggecdeac desambic amma edengunuduae. Nga ngeneng mong mi memanganenugec. <sup>13</sup>Sebiugeng ebicnagoc amma naso imohai hanahema siduc gombung dekperagingemmeai, imoc bic negendae. <sup>14</sup>Nga sebinaac ebicngo ngeni tobangngunuec, fora nga ngeneng mi negemmanugec amma mi wanugec, kpac. Ngeni Anutuac angero mong me Yesu Kristongo haec, ifi garenggebau isoc ni hoannuma garenugec. <sup>15</sup>Anu yaguc ine songongina engsac kpac ande. Ngeni warac songo homac negemma kicgbomangina mesima nenggecdeac siriha anggec, ngeneac gombung imoc hepuc amma dekperagiduae. <sup>16</sup>Ni goroyoac edengunuba ngeni neac yoac wagec, imocac obohoduae.

<sup>17</sup>Ngic wangecngunubeso angkecdae, yeneng ngeni yenigoc torokpema nanggecdeac gereagoc yombong dekecdae. Amma yeni ngeneac gombunga mong mi negensidae, kpac. Ngeneng yoacnginaac songo negemma yenearu torokpegecde, imocac ine ayemmede. <sup>18</sup>Ni ngenigoc kefai, imohai faka gombunga modacgecdeac uatoa megec. Amma faka gombunga modacgecde, uatoa imocac nasosoc mekecbisia. <sup>19</sup>Nambaracfocna, ni ngeneac amma monggoc kpendzeng gadze isoc nikelde, ifi angkecbare Kristongo ngeneac hereu fingectegecbeso. <sup>20</sup>Ni ngeneac negemma dafi ambade, imoc obohoyombonggema negen negeng ua mekecduae. Amma ngenigoc yofinenggac kecbai dede goroyoacna seria naric wama yoac yumea deba ngeni imoc modacbau.

<sup>21</sup>Anu dedeseriyoacac bageu kecbeso angemmedeu, ngeni kedzac faima yoac yomoc negembisia, <sup>22</sup>Abarahang ye medahora yohockang, mitikibiu yoac ifi oho ohoya fede, medac mongngo enema yombong, yearunac nga mong ine wanacngac yearunac. <sup>23</sup>Nga medaha wanacngac yearunac, ye sebiac arennu fingerec nga enemaarunac yombong fingerec, yeng Anutuac dedzegeyoac feec, imocac arennu fingerec.

<sup>24</sup>Ni yoac heima yofi deduae. Ngac yohockang yeri dzadzahac yohockanggac onga andape. Dzadzahac mong imoc Sinai tikiu Arabia bangecfu yoac dedzege anggec, imocac nambaracfura yeni wanac kekecac bageu fingeckedae, imocngo Haga ande. <sup>25</sup>Amma Yerusareng

imoc Hagaac ongea ande. Yerusareng ye yaguc yengena nambaracforagoc wanac areng amma witicfu kecdae. <sup>26</sup>Nga wi kurumennu Yerusareng mong witiha kpac, imoc nenang nonggonina yombong. <sup>27</sup>Nga yoac yofi oho ohoya fede,

“Ngac kufing sabacga kpac, ge sogac sogaigoc kecna. Nga ngac gadze mong mi giec, ge kuçgoc sogaima arohona. Ngac kosic yeac nambaracfora homac, kpetenginango ngac eweagoc yeac nambaracfora kpetengina feraheude.” *(Yesaia 54:1)*

<sup>28</sup>Tosofocna, Anutungo Abrahanggoc yoac dedzege anu Isaka fingerec, ifi isoçngoc Anutungo Yesuac amma yoac dedzege meficgeu yengena nambaracfora fingering. <sup>29</sup>Ngc sebiac arenunac fingerec, yeng naso imohai ngic Asuac arenunac fingerec, ye kpekporac ammiec, siric imocngo yaguc fede. <sup>30</sup>Nga mitikibingo imocac negensima yofi dede,

“Ge wanacngac medahagoc kporacyuruna kenec, nocac wanacngac yeac medahango enengyombonga yeac medacgoc maridzoming naric mi meecde, kpac.” *(Fingec fingec 21:10)*

<sup>31</sup>Tosofocna, imocac nenang wanacngac yearunac kpac, nenang ngac enema yombonga yearunac.

**5** <sup>1</sup>Nenang witiha kpac kecnideac Kristongo witicfunac yungecnunuec, imocac ngeni serima nambisia. Ngeni monggoc wanac kekecac bageu faingunubauac henghomema kecbisia.

<sup>2</sup>Negendae, ngeni sebi tosangina herecgegecdeu Kristoarunac memefic mong mi megecde, ni Paurongo imoc edengunuduae. <sup>3</sup>Ngc sebi tosangina herecgegecdeu yeni dedeseriyoac hafoangoc tofohoma modacdabsia, imoc serima monggoc edengunuduae. <sup>4</sup>Nga ngic Anutuac kicfu dindingac nanggecdeac dedeseriyoac modacgecdeac negendae, ngeni Kristoarunac kperecgeemema yegoc monggoc mi kpeketahama Anutuac wosoefac wama ngadeau kecgecde. <sup>5</sup>Nga Asungo wangecnunu neneg negensinnu kecni Anutungo dindingac kpacnunuude, imoc menideac tomai kecdimbe. <sup>6</sup>Nenang Yesu Kristoaru kpeketahama kecnideu sebi tosea herec herecgea me mi herc herecgea, imocngo wiac engena mi ande. Negen negensinninango heresongogoc hoangemema mekecnide, imocngo fora ande.

<sup>7</sup>Amma ngeni mitiac sinnu nedzi nedzi gombunga nedzimagec ngic merang singngina hedzickeu yoac fora wama kecdae. <sup>8</sup>Anutungo kpacngunuec amma yeng faka ifia anggecdeac mi fenggengunuec, kpac. <sup>9</sup>Yis kapianecngo uuha sasawa sokodarude. <sup>10</sup>Nga Kebugoc kpeketahema ngeneac negemma yofi negensima kecduae, ngeni neac negeng imoc modacma kecma negeng negeng goa wagecde. Nga ngic mong ye negengyohoc meficgengemmekede, yeng kopocsicac turunga meficgeude. <sup>11</sup>Tosofocna, sebi tosa herec herecgea sing imoc mi dekperagiduae, sing imoc bic wayai. Imocac amma ngic yeni nukporac

anengkecdae. Ngic yeni sebi tosangina herecgegecdeac kpouyemmebai dede ngicngac yeni mariponggac yoacac ngaba mi ambau.<sup>12</sup> Nga ngic goango yoacnina kpekecma negen negengngina mesufuma kecdae, yeni sebi tosangina hafoangoc herecgema meickegec ngereebac.

<sup>13</sup> Tosofocna, ngeni witicngina kpac kecgecdeac Anutungo kpacngunuec. Ngeni witicngina kpacac amma ine degbedic yoac dema uba esea modacgec mi ngereeude. Imoc mi fingerudeac ngeni songogoc hoangemekecma wanacngic isoc kingang kpeemebisia. <sup>14</sup> Imoc yofiac, dedeseriyoacng hafoangoc kpeturanggema yofi fede,

“Ge geangga anggengande, siriha imocngoc ngicngac ogofocga heresongogoc hoangyunukebesena.” *(Sesememe 19:18)*

<sup>15</sup> Nga ngeni ine ngenaocngoc enacngo ingiemema ewekpebuc angemekecma memanganeemebauac garengngina meemebisia.

<sup>16</sup> Ni yofi deduae, ngeni Tiri Asugoc heirima kengkecbisia. Amma ngeni uba eseaac negensongo wama imoc mi modacbisia. <sup>17</sup> Uba eseango Asuac kekec kpeude nga Asungo uba eseaac kekec kpeude. Yeri ngaba angemeandape, imocac ngeni wiac gombunga ambesonga negengkecdae, imoc waandae. <sup>18</sup> Nga Asungo wangeungunu kengkecdaeu dedeseriyoacac bageu mi kecgecde.

<sup>19</sup> Nga uba eseaac angammeme didiu yofi fingectegerude, Kaisero faka nga sebiac songo hania hania. <sup>20</sup> Nemiac eweheihei kekec nga dzinac faka amma ngabagoc tohoeme kekec, ngeni yoacngina ngabasiric angandae nga kichodung nga herebu amma tusucnene faka, gurunegigoc tohoeme kekec amma mitiareng ikoha hania hania. <sup>21</sup> Imoc keracmangang nga doku seria negec uba mesufu ayemmekedce amma faka goa ifia. Warac edengunuai nga yaguc monggoc gorongina kpema edengunudiae, ngicngac faka ifia modacandae, yeni Anutuac eucererenggac maridzoming naric mi megecde.

<sup>22</sup> Asuac fora imocng heresongogoc hoangemema kekec nga ubangerec amma ruae nga modzotitia kpac amma faka yumea nga faka gombunga amma negen negensinggoc kekec, <sup>23</sup> nga wosoefacgoc kekec amma faka nomana. Dedeseriyoacng faka ifia sasawa kpaе mong mi heiude. <sup>24</sup> Anu Yesu Kristoac ngicngac yeni uba eseangina imocac hereyacyac nga negensongogoc, imoc mariponnu bic kpegec homeec.

<sup>25</sup> Asungo kekecnina meficgenemmeudeu, yengngoc kekecnina garenggeu nenang ye modacbisia. <sup>26</sup> Modacma sebiengeng me keracmangang angemema mi tobangemebisina.

**6** <sup>1</sup> Tosofocna, ngenearunac ngic monggo sing feraheu ngic Asugoc kecdae, ngeneng imoc meficgema ngic ifia uba yumeau edemengere ambisia. Nga ngenang ifingoc faitobannu makpebauac ine garengemema kecbisia. <sup>2</sup> Ngeni botucnginai ebicngina fuama emekpesi kecbisia. Ifi amma Kristoac dedeseriyoac hafoangoc modacgecde. <sup>3</sup> Ngic mong ye

engena mi amma yengenaac negenu engena ande, ye ine yengenaoc ikoc angemeude. <sup>4</sup>Nga ngeni tembuc tembuc angammemengina hengising ambisia. Anu mongngo henu fakaya naric anu, imocac ubangerec yengenaaru febeso. Femiudeu goa yeneac faka hemma imocgoc mi isinggebeso. <sup>5</sup>Ngic tembuc tembuc yeni ebicngina tembuc tembuc tofogecde.

<sup>6</sup>Kpoukpoufocngina Anutuac yoac kpoungemmeandae, ngeni yeneac negensima wiacngina gombunga hendzicma yeneac noboha yemmebisia. <sup>7</sup>Anu ngeni ikoc angemebauac henghomema kecbisia. Ge Anutu ikoc ammima naric mi tobanggenade. Ngic mong ye semeng mong homerude, ye semeng fora siriha ifiangoc kpedziude. <sup>8</sup>Ngic mong ye uba esa arennu wiac homecande, yeng uba eseaac arennunac foraya kpedziu manganema kpac anude. Nga Asuac arennu wiac homecande, yeng imocac fora, kekeha wisickea kpac kpedziude. <sup>9</sup>Imocac amma faka gombungaac kucmama mi ambisina. Nenang modzotitia kpac kecma faka gombunga amma kecmrina nasoyada hau semeng fora gombunga menide. <sup>10</sup>Nenang nasonina fedengoc, imohai ngicngac sasawa faka gombunga ayemmekecbisina nga arengfocnina Kebunina negensinggema kecdae, yeni momoc gombunga ayemmebisina.

<sup>11</sup>Henggec, neannaoc marinango kibi kuneng yombong ohonggemduae. <sup>12</sup>Ngic sasawa yeni sebi tosangina herecgegecdeac igocngunuma dekecdae, yeni uba eseaac siricfu engena anggecdeac amma ifi degecde. Amma yeni Kristoac mariponggac amma yunukporac ayemmebauac, imocac ifi angemmekedae. <sup>13</sup>Ngic sebi tosangina bic herecgegec, yeni yenaoc dedeseriyao mi tofohokecdengoc. Yeni ine ngeneac negemma yenaoc kpac kuneng megecdeac amma ngeneng sebi tosangina herecgegecdeac homac ayemmeude. <sup>14</sup>Nga neng wiac monggac negemma kpacna mi miacbade, kpac yombong. Kebunina Yesu Kristoac mariponggac amma bangecac wiacngi mariponnu homeec nga neng ifingoc bangecac wiacac homemiaiac negemma dedengerec angkecduae.

<sup>15</sup>Ngic sebi tosa herec herecgea me mi herec herecgea imocngo wiac engena mi ande. Nga Anutungo deu wiac gboria fingerec, imocnko ine wiac engena ande. <sup>16</sup>Nga ngicngac singyoac imoc kekecnginai modackedae, yenearu ruae nga wosoefacngo witinginai febeso amma Anutuac Israe yenearu ifingoc.

<sup>17</sup>Amma yofi desiduae, ngic mongngo ni ubaebic monggoc mi nembeso nocac Yesuac kubehaac ebic sebinai mekecduae

<sup>18</sup>Tosofocna, Kebunina Yesu Kristoac wosoefacngo ngeneac ongaasunginagoc febeso, imoc fora.